

## **DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CÖRINTO**

*Pablo dxuzúaje' chee bíchedxu zaj zre'e xezre Corinto*

<sup>1</sup> Neda', Pablo, naca' benne' bláwizra Dios chee gaca' gubáz chee Jesucristo. Naca na da guca lazre' Dios gaca'. Tu zren nen bíchedxu Sóstenes

<sup>2</sup> dxuzúaja' da nigá cheele le'e, bi bicha', zrágale chee Dios lu xezre Corinto. Nácale bi chee Dios lawe' da nácale tuze nen Jesucristo. Dios ba bláwizre' le'e chee gácale bi cheequeze' tu zren nen xúgute benne' ca' zaj zre'e du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u.

<sup>3</sup> Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'e le'e.

*Da chawe' da nápadxu ne chee Cristo*

<sup>4</sup> Dxápequeza' Dios: Xcalenu', ca naca cheele ne chee da chawe' da benna Dios le'e ne chee Jesucristo.

<sup>5</sup> Lawe' da nácale tuze nen Cristo, Dios ba benne' le'e xel-la gunní'a zante da naca chee Be' Lá'azxa chee', lu da dxuchálajle, ne lu da nézele.

<sup>6</sup> Ca' naca na, da dxuchálajdxu ca naca chee Cristo ba guca na li cheele le'e.

<sup>7</sup> Ca' naca na, quebe bi dxexázrjele ca da dxunna Dios dxi'u dxácatę dxebézadxu zra xelá' Xránadxu Jesucristo.

<sup>8</sup> Le' guxru chache' le'e ca zrin zra bzebe, cheę quebe nu benne' gaca gusebáguę' le'e zría gate xelá' Xránadxu Jesucristo.

<sup>9</sup> Dios tu dxúnzqueze' ca da nachebe lazre', naque' Bénnea' bláwizre' le'e cheę gácale tuze nen Zrí'ine', Xránadxu Jesucristo.

### *Dxaca chupa la'a bi cheę Cristo*

<sup>10</sup> Bi bicha', dxata' xúeda' le'e lu La Xránadxu Jesucristo, cheę gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lázrdaule, ne da gunle.

<sup>11</sup> Da nigá dxapa' le'e, bi bicha', lawe' da buluzén benne' xrtia Cloé neda' dxutíl-lale dizra'.

<sup>12</sup> Da nigá zéaję na nácale chupa la'a, na' bál-lale dxennale: Netu' da'ntu' Pablo. Xezícale dxennale: Netu' da'ntu' Apolos. Xezícale dxennale: Netu' da'ntu' Pedro. Xezícale dxennale: Netu' da'ntu' Cristo.

<sup>13</sup> ¿Dxéquele naca Cristo chupa la'a? ¿Dxéquele gudá'a neda', Pablo, le'e xaga béguaj waláz cheele? ¿Bedxúale le'e nisa lu la Pablo?

<sup>14</sup> Xcalén Dios quebe núlale le'e bchua' nisa san tuze Crispo, ne Gayo

<sup>15</sup> lawe' da quebe nu gaca nna: Lu la Pablo gudxúa' nisa.

<sup>16</sup> Cá'anqueze bchua' nisa benne' xrtia Estéfanas, san quebe dxeajsá lazra' che nu xetú bchua' nisa.

<sup>17</sup> Cristo quebe gusel-le' neda' nu guchúa' nisa, san cheę guzenda' bénneache dizra' chawe' cheę',

quegá nen dizra' sina, chee quebe gaca dácheze da ben Cristo gate gutie' le'e xaga béguaj.

*Cristo naque' xel-la waca, ne xel-la sina chee Dios*

<sup>18</sup> Dizra' ca gute Cristo le'e xaga béguaj naca na ca tu da xálaze lau benne' xelebía xi'e, san cheedxu dxi'u, nápadxu xel-la weselá, dizra' nigá napa na xel-la waca chee Dios.

<sup>19</sup> Naca na ca naxúaj na lu dizra' lá'azxa. Dxenná Dios:

Guzría xi'a xel-la sina chee benne' sina ca', ne guzúa' chalá'ala xel-la naxéajni'i chee benne' dxeléajni'ine'.

<sup>20</sup> ¿Gazra nagá'ana benne' sina na'a? ¿Waca guselá cuine'? ¿Gazra nagá'ana benne' dxusédene' bèneache? ¿Gazra nagá'ana benne' dxuchálaje' ca naca da dxaca lu xezr la xu nigá? Ca naca xel-la sina chee xezr la xu nigá, Dios ba nune' na tu da xálaze lawe' da tuze Le' gaca guselé' bèneache.

<sup>21</sup> Dios nézene' xúgute. Quebe be'e lataj bèneache xelúnbe'e Le' ne chee xel-la sina chee bèneache. Bezaca ba lazre' Dios ne chee dizra' nigá bselé' benne' ca' dxuluxrén lazre' Le', lácala zaj zra' benne' dxeléquene' naca dizra' nigá tu da xálaze.

<sup>22</sup> Benne' judío ca' dxelaca lazre' xeelé'ene' xel-la waca da za xabáa, na' benne' griego ca' dxelxíaje' xel-la sina,

<sup>23</sup> san dxi'u dxuzendxu bèneache ca naca chee Cristo, ca gutie' le'e xaga béguaj. Benne' judío dxelexedué'ene' chee dizra' nigá, na' benne' quebe zaj naque' judío dxeléquene' naca na tu da ca zeaje na.

24 Na'a, benne' ca' ba bláwizra Dios, benne' judío ca', ne benne' quebe zaj naque' judío, Cristo nácaqueze' xel-la waca, ne xel-la sina chee Dios.

25 Da dxeleque bènneache naca tu da xálaze chee Dios nácadxa na sina ca xel-la sina chee bènneache, na' da dxeleque bènneache naca na tu da naca bea nate ni'a na' Dios nápadxa na xel-la waca ca xel-la waca chee bènneache.

26 Le'e, bi bicha', dxal-la' gueque be'ele ba bláwizra Dios le'e lácala bábaze le'e nácale sina lau bènneache chee xezr la xu nigá, ne bábaze le'e nácale xel-la dxenná bea, u nácale xrtia benne' zaj naque' blau.

27 Dios ba guqué'e benne' ca' dxeleque bènneache zaj naque' benne' xálaze, chee xelexedué'e benne' sina ca', ne ba guqué'e benne' ca' dxeleque bènneache zaj nate ni'a ne'e, chee xelexedué'e benne' wal-la ca'.

28 Dios ba guqué'e benne' ca' quebe zaj naque' blau, ne benne' ca' zaj nuzúa bènneache chalá'ala, benne' ca' quebe nu zaj naque', chee guzague' naze benne' zaj naque' blau,

29 chee quebe nu seque' gucá'ana szren cuina lau Dios.

30 Diósqueze ba nune' le'e tuze nen Jesucristo, ne nune' naca Cristo Benne' dxunna dxi'u xel-la sina, ne Benne' gucá'ana dxi'u xrlátaje, ne Benne' dxuzúe' dxi'u lu na' Dios, ne benne' dxexá'awe' dxi'u.

31 Ca' naca na ca da naxúaj na lu dizra' lá'azxa, da dxenná na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

## 2

### *Dizra' ca naca chee Cristo, gudé'e xaga béguaj*

<sup>1</sup> Na'a, bi bícha'dau', gate bedajchálajlena' le'e da li chee Dios, quebe bchíneda' dizra' sina, ne dizra' zaca.

<sup>2</sup> Gate ne zúalena' le'e quebe guca lazra' guchálaja' chee bila da xetú san tuze chee Jesucristo, Bénnea' gudé'e xaga béguaj.

<sup>3</sup> Gate guzúalena' le'e ne nátete ni'a na'a, ne guzrízetea' lawe' da bzreba' quebe guca guna' da nusebaga' Cristo neda'.

<sup>4</sup> Gate bchálajlena' le'e, ne bzenda' le'e dizra' chawe', quebe guca lazra' guna' chéajlele chee nen dizra' sina chee bénneache da guchálaja', san bena' guxéajlele chee ne chee Be' Lá'azxa, ne ne chee xel-la waca chee Dios

<sup>5</sup> chee gápale xel-la dxeajlí lazre' da naca na ne chee xel-la waca chee Dios, ne quegá ne chee xel-la sina chee bénneache.

### *Dios dxulé'e cuine' ne chee Be' Lá'azxa*

<sup>6</sup> Dxuchálajntu' dizra' sina lau benne' ca' ba zaj ze chache' lu xel-la dxeleajlí lazre' chee'. Xel-la sina nigá quebe naca na xel-la sina chee xezr la xu nigá, ne chee benne' dxelenná be'e lu xezr la xu nigá, benne' ca' xeledé chie'.

<sup>7</sup> Dxuchálajntu' xel-la sina nagache chee Dios, da na' bzua Dios nédxudaute ca bene' xezr la xu nigá, chee ladxu chadía chacanna.

<sup>8</sup> Netú benne' ca', benne' dxelenná be'e lu xezr la xu nigá, quebe guléajni'ine' da nigá, lawe' da la guléajni'ine' na quebe buludé'e Xránadxu, Benne' xabáa, le'e xaga béguaj.

9 Naca na ca da naxúaj na lu dizra' lá'azxa, dxenná na:

Dios ba nucueze' chee benne' ca' zaj nazrí'ine' Le' da ca' quebe nu ne le'e, ne quebe nu ne xen, ne da quebe nu ne cu'u lazre'.

10 Da caní zaj naca na da ble'e Dios dxi'u ne chee Be' Lá'azxa nase-la Le', lawe' da dxelé'e Be' Lá'azxa xúgute da de, ne duté da xu'u na lu xichaj lázrdau Diósqueze.

11 Ládujla bénneache, ¿nu seque' neze da xu'u lu xichaj lázrdau xetú benne', san tuze be' da nacaqueze'? Cá'anqueze, tuze Be' Lá'azxa chee Dios nézene' da xu'u lu xichaj lázrdau Dios.

12 Be' Lá'azxa da xú'udxu quebe naca na chee xezr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u.

13 Dxuchálajntu' ca naca da caní nen dizra' da bsede Be' Lá'azxa chee Dios netu', ne quegá nen dizra' da bsédentu' lu xel-la sina cheentu'. Ca' naca na, dxuzéajni'intu' benne' zaj nazi'e Be' Lá'azxa chee Dios da nusede Be' Lá'azxa nigá dxi'u.

14 Nu benne' quebe nazi'e Be' Lá'azxa chee Dios quebe dxezí' lu ne'e da zaj naca na chee Be' Lá'azxa chee Dios, lawe' da dxéquene' zaj naca na tu da xálaze. Quebe dxezeque' chéajni'ine' na lawe' da zaj naca na da dxéajni'idxu tuze ne chee Be' Lá'azxa.

15 Bénnea' nazi'e Be' Lá'azxa chee Dios dxéquene' chéajni'ine' xúgute da dxulé'e Be' Lá'azxa le'. Benne' quebe zúale Be' Lá'azxa le', quebe séquene' chéajni'ine' da dxuséde Be' Lá'azxa dxi'u.

16 Naxúaj lu dizra' lá'azxa da dxenná na: ¿Nuzra ba guxéajni'i da xu'u xichaj lázrdau Xránadxu?

¿Nuzra benne' séquene' guzéajni'ine' Dios? Dxi'u nazidxu ca da xu'u xichaj lázrdau Cristo.

### 3

#### *Benne' dxelune' tu zren Dios lu zrin chee'*

<sup>1</sup> Na'a, le'e, bi bícha'dau', quebe guca guchálajlena' le'e ca dxuchálajlena' benne' ca' zúale Be' Lá'azxa chee Dios le', san bchálajlena' le'e ca dxuchálajlena' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo.

<sup>2</sup> Bsédeda' le'e da quebe zaj naca na stebe da naca na ca da dxugágudxu bidu dxe'ene, bidu ne dxázrebe', ne quebe gaca gágube' xel-la wagu da naca na zibaj, lawe' da quebe ne séquele chéajni'ile da zaj naca na stebe. Cá'anqueze na'a quebe ne séquele chéajni'ile na

<sup>3</sup> lawe' da ne nácale ca zaj naca benne' cun ca nalaje'. Dxácatę ne xu'ule xel-la zre lazre', ne dxutil-la ljuwézrele dizra' ne nácale chupa la'a, ne nácale ca zaj naca benne' cun ca nálaje', ne dxunle cáteze dxelún xúgutę bénneache.

<sup>4</sup> Dxácatę ne dxennale: Netu' da'ntu' Pablo, na' xezícale dxennale: Netu' da'ntu' Apolos, ne dxunle ca dxelún benne' cun ca nálajze'.

<sup>5</sup> Na'a, ¿nuzra na' Pablo? ¿Nuzra na' Apolos? Nácantu' wen zrin chee Dios, na' ne chee netu' guxéajle chee Xránadxu. Tu tuntu' bentu' zrin chee Xránadxu da blé'eng' netu'.

<sup>6</sup> Neda' guza' binnedu ca' lu xichaj lázrdaule, bchálajlena' le'e xrtizra Dios, na' Apolos gudile' na, san Dios bsegule' na.

7 Ca' naca na, ne benne' dxaze', ne benne' dxile' na, quebe bi zaque', san Dios na' dxune' xúgute, lawe' da dxusegule' da du ca'.

8 Benne' dxelaze', ne benne' dxelile' zaj naque' lébete, san Dios quízruje' tu tu benne' caní ca naca zrin da belune'.

9 Nácantu' wen zrin tu zren nen Dios, na' le'e nácale ca tu xezr la xu naga dxun Dios zrin.

Cá'anqueze nácale ca tu xu'u da dxun Dios.

10 Neda' naca' ca tu wen xu'u blau, na' Dios benne' neda' lataj gulecha' lane na, na' benne' xula dxusegule' ze'e na'. Tu tu benne' dxal-la' guxúe xánnie' ca dxusegule' na.

11 Québedxa nu seque' cueche' xetú lane ca da ba dxe', da na' naca na Jesucrístoqueze,

12 san waca nu benne' gusegule' lawe' na da zaca na ca oro, ne plata, ne xiaj da zaj zaca, u waca gusegule' lawe' na da quebe zaca na ca blaga', ne xizre, ne luaj laga'.

13 Zrin da nun tu tu benne' gulé'equeze lawe na lu zra guchi'a Dios, lawe' da lu zra na' la' tu xi', na' lu xi' na' gulé'e lawe na ca naca zrin nun tu tudxu.

14 Che nu benne' nune' tu zrin da quebe chezxe na lu xi', na' wazi'e lazruj chee'.

15 Che chezxe zrin na', ca naca na nite na, san léqueze' walé', ca tu benne' dxexedxúaje' lu xi'.

16 ¿Quebe nézele le'e nácale xudau' chee Dios, na' Be' Lá'azxa chee Dios zue' lu xichaj lázrdaule?

17 Che nu benne' gucá'ana dítaje' xudau' nigá chee Dios, Dios guzría xi'e bénnea' lawe' da naca lá'azxa xudau' chee Dios, na' lé'eequezle nácale xudau' na'.



<sup>18</sup> Quebe si xē cuínale. Che núlale dxéquele nácale benne' sina lu da naca chee xēzr la xu nigá, dxal-la' xun cuínale ca tu benne' quebe bi dxaque', chee gunna Dios le'e xel-la sina li.

<sup>19</sup> Xel-la sina chee xēzr la xu nigá naca na tu da xálaze lau Dios. Naxúaj lu dizra' lá'azxa da dxenná na: Dios dxun zréajane' benne' sina ca' lu xel-la sina da zaj nápaqueze'.

<sup>20</sup> Cá'anqueze dxenná na: Xránadxu nézene' quebe bi zaca da dxululaba lazre' benne' sina ca'.

<sup>21</sup> Chee lē na' quebe nu benne' dxal-la' gun szren cuine' lawe' da de'e tu benne', lawe' da Dios dx-unne' le'e xúgute da ca' dxechínnele.

<sup>22</sup> Pablo, ne Apolos, ne Pedro, ne xēzr la xu nigá, ne xel-la nabán, ne xel-la gute, ne na'a zra, ne da za za', ne xúgute da ca' zaj naca na chee gaca da chawe' chee,

<sup>23</sup> na' lé'equezele xu'ule lu na' Cristo, na' Cristo xu'e lu na' Xradxu Dios.

## 4

### *Zrin dxelún benne' gubáz chee Cristo*

<sup>1</sup> Ca' naca na, dxal-la' guéquele nácazentu' wēn zrin chee Cristo, ne nabágentu' gusédentu' bēneache da zaj nagache chee Dios.

<sup>2</sup> Na'a, benne' nabague' tu zrin, dxun na ba xen gaque' li lazre'.

<sup>3</sup> Neda' quebe dxe'a gunne xue bi dxéquele naca' neda', u bi dxeleque bēneache naca'. Quebe gaca nnia' xrlátaje u quegá chee da nuna'

<sup>4</sup> lawe' da lácala quebe dxagu na zria neda' lázrdawa', da nigá quebe dxulé'e na quebe nabaga'

zria. Xránadxu naque' Benne' dxuchi'e ca da dx-una'.

<sup>5</sup> Ca' naca na, quebe guchí'ale chee da ca' che quebe ne zrin zra. Le cueza zra xelá' Xránadxu, na' xebéaje' lu xel-la naxaní' ca naca da nagache lu da chul-la. Xránadxu gulé'ene' ca naca da dxulaba lázredxu, na' Dios gulé'ene' chawe' tu tudxu ca da dxal-la' sidxu.

<sup>6</sup> Le'e, bi bicha', dxuchálajlena' le'e da caní chee gaca chawe' chee, dxuzúa' ca tu da gulé'e na le'e Apolos, ne néda'queza'. Dxennía' da nigá chee gusédele ne chee netu' chee quebe gundxale ca da dxue lataj dizra' lá'azxa le'e, ne chee quebe gucá'ana szren cuínale, ne chee quebe guzúale chalá'ala le sa' ljwézrele.

<sup>7</sup> ¿Nuzra nun lue' blaudxa ca xezícadxa benne'? ¿Bizra napu' da quebe nunna Dios lue'? Che Le' benne' chiu' da na', ¿bizr chee na' dxucá'ana szren cuinu', dxéquenu' lué'queze gudilju' da na'?

<sup>8</sup> ¿Nácale le'e benne' gunní'a? ¿Nápale xúgute da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaquezle wenná bea chee guntu' netu' le'e tu zren lu xel-la dxenná bea chee.

<sup>9</sup> Dxéqueda' Dios nuzúe' netu', benne' gubáz chee', lu lataj bzebe. Nácantu' ca benne' ba zaj nabía xi' chee gátentu'. Nácantu' ca tu da dxuzé na lau bénneache, na' dxelenná' gubáz chee xabáa ca', ne bénneache netu'.

<sup>10</sup> Dxeleque bénneache nácantu' netu' tu da xálaze lawe' da dxuntu' zrin chee Cristo, san le'e dxéquele dxéajni'i xánnele da zaj naca chee Cristo. Dxeleque bénneache nate ni'a na'ntu' netu' san le'e dxéquele

nácale le'e benne' wal-la. Dxuluzúa bénneache netu' chalá'ala, san dxelape' le'e ba lá'ana.

11 Ga bzrinte lu zra na'a zra dxeduntu', ne dxebíentu', ne nácantu' gala xídeze, na' bénneache dxulucháchalene' netu', ne quebe zua lízrentu'.

12 Dxexedú lázrentu' dxuntu' zrin. Dxelenné bénneache schanni' cheentu', san netu' dxexechébentu' dizra' chawe'. Zaj nau zi' xuzre' netu' san dxuchaga launtu' na.

13 Dxelenné' schanni' cheentu', san netu' dxuchálajentu' le' da li dute xel-la zren lazre' cheentu'. Dxelune' netu' ca tu xizre bebe, ne ca tu da ba guca ditaj chee bénneache ca lu zra na'a zra.

14 Quegá dxuzúaja' chee da nigá chee xedué'ele, san chee guzėjni'ida' le'e, nácale ca bi chia' nazri'ite lazra'.

15 Lácala zaj zúale le'e gaxúa gaxúane benne' dxulusédene' le'e ca naca chee Cristo, quebe nu zua xetú xrale. Néda'queza' naca' xrale lu xel-la dxeajlí lazre' chee Cristo lawe' da bzenda' le'e dizra' chawe' chee Jesucristo.

16 Ca' naca na, dxata' xúeda' le'e gunle ca dxuna' neda'.

17 Chee le na' dxusel-la' Timoteo xedajná'abe' le'e, nácabe' ca bi li lazre' chia' nazri'ite lazra', lu da naca chee Xránadxu. Lebe' gusá'abe' lázrele ca dxuna' lu da naca chee Cristo, ne ca naca da dxusédeda' bénneache gáteteze na', ne lau xúgute cue' bi chee Cristo.

18 Bál-lale le'e ba nucá'ana szren cuínale lawe' da dxéquele quebe xida' xedajnnaba' le'e,

19 san dxebeza lazra' xídazequeza' xedajnná'a le'e che gunna Xránadxu lataj. Nadxa le'eda' da

dxezezeque' xelún benne' ca' dxulucá'ana szren cuine', ne quegá tuze da dxelenné'.

<sup>20</sup> Che dxenná be'e Dios dxi'u quebe naca na chee tu da dxuchálajzedxu. Lécaze' ba nunne' dxi'u xel-la waca chee'.

<sup>21</sup> ¿Bizra dxaca lázrele le'e? ¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexruj lazre'?

## 5

### *Pablo dxuchi'e chee tu da sban*

<sup>1</sup> Ba benda' zua tu benne' ládujla le'e nune' ca zru'ule' xrna zie'. Da nigá naca na tu da sbánle'e da quebe ne xelún benne' quebe zaj núnbe'ene' Dios.

<sup>2</sup> Ca naca da na' le'e ne dxucá'ana szren cuínale. Dخال-la' cuezre xáchele. Bénnea' nune' da nigá dxal-la' xebéajle le' ládujla le'e.

<sup>3</sup> Quebe zua' neda' naga zúale lu bela' dxen chia', san naca cáteze zúalena' le'e lu be' nácaqueza', na' ba bchi'a chee bénnea' nune' dul-la nigá ca tu benne' zúalétequeze le'e.

<sup>4</sup> Le zraga le'e lu La Xránadxu Jesucristo, na' gaca na cáteze neda' súalena' le'e lu be' nácaqueza', na' xel-la waca chee Xránadxu Jesús suale na le'e.

<sup>5</sup> Nadxa dxal-la' xudele bénnea' lu na' Satanás da xriwe', na' lácala cuía xi' bela' dxen chee' na' be' nácaqueze' la na lu zra xelá' Xránadxu Jesús.

<sup>6</sup> Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na: Láteze cua zichaj dxuchazra na ca naca cua na'?

<sup>7</sup> Le xebéaj chalá'ala cua zichaj gula na' da dxuxrinnaj na le'e, chee gácale ca tu xeta xtila da dxágudxu Laní Pascua, da dxundxu nen cua cube

da quebe nachixre na cua zichaj, ca da li nácale le'e. Crístoqueze gutië' waláz cheedxu. Naque' cheedxu zrila', be dxelutië' laní pascua.

<sup>8</sup> Ca' naca na, dxal-la' gupá'adxu Laní Pascua cheedxu lu da naca du lazre', ne lu da li, da ca' zaj naca na ca xeta xtila da quebe nachixre na cua zichaj. Quebe gupá'adxu na lu da cale<sub>l</sub>a, ne lu da zrinnaj, da ca' zaj naca na ca cua zichaj gula na'.

<sup>9</sup> Lu da bzujaja' chee<sub>l</sub>e nédxudxa gucha' le'e quebe guchixre chee<sub>l</sub>e nen benne' ca' dxelunë' da sban.

<sup>10</sup> Quebe gucha' le'e xecuásatequezele chee<sub>l</sub>e benne' zaj zre'ë xezr la xu nigá, benne' dxelunë' da sban, ne benne' wecude' ca', ne benne' gubán ca', ne benne' dxelúe lá'anë' bedáu' xiaj xaga ca', lawe' da chee<sub>l</sub>e quebe guchixre chee<sub>l</sub>e nen benne' caní, dxun na ba xen xedxúajle xezr la xu nigá.

<sup>11</sup> Da guca lazra' xapa' le'e naca na chee<sub>l</sub>e quebe guchixre chee<sub>l</sub>e nen netú benne' dxennë' naque' bíchedxu, san dxunë' da sban, u naque' benne' wecude', u dxue lá'anë' bedáu' xiaj xaga, u dxutupe' dizra' bizruj, u dxí'aje', u naque' gubán. Quebe dxal-la' gágule<sub>l</sub>e benne' caní.

<sup>12-13</sup> Quegá naca chia' guchi'a chee<sub>l</sub>e benne' dx-eledá cúzrela. Dios guchi'ë chee<sub>l</sub>e benne' ca'. Le'e dxal-la' guchi'ale chee<sub>l</sub>e benne' zaj naque' bi bíchedxu. Chee<sub>l</sub>e le<sub>l</sub>e na' le xebéaj benne' dul-la na' ládujla le'e.

## 6

### *Zria da dxelagu ljwezre bi ca' chee Cristo*

<sup>1</sup> Gate tule le'e zua da dxaca chee<sub>l</sub>e nen xetule le'e, ¿bizr chee<sub>l</sub>e na' dxeajle lau benne' dxuchi'ë da

dxaca, na' quebe dxéajle'e chee Cristo, ne quebe dxeajle lau bi bíchele?

<sup>2</sup> ¿Quebe nézele le'e, benne' zaj naca bi chee Dios xuluchí'e ca da dxelún bènneache chee xezr la xu nigá? Che le'e guchí'ale chee bènneache lu xezr la xu nigá, ¿quebe naca chee le guchí'ale chee tu da dauze?

<sup>3</sup> ¿Quebe nézele le'e guchí'adxu chee gubáz chee xabáa ca'? Cá'anqueze dxal-la' guchí'adxu da naca chee xezr la xu nigá.

<sup>4</sup> Che le'e zua da dxaca chee le lu xezr la xu nigá, ¿bizr chee na' dxeajle lau benne' ca' quebe nu zaj naque' ládujla bi bíchedxu ca' chee xuluchí'e chee da na'?

<sup>5</sup> Da nigá dxapa' le'e chee gapa stu'le. ¿Quebe nu chilá' ládujla le'e nu bíchedxu, benne' naxéajni'ine' chee guchí'e tu da dxaca chee bi bíchedxu ca'?

<sup>6</sup> ¿Dxun na ba xen tu bi bíchedxu cheajtágube' zria da dxaca chee be' nen benne' ljuwézrebe' lau tu benne' dxuchi'e da dxaca, na' quebe naque' bi chee Dios?

<sup>7</sup> Che zua da dxedíl-lalele biche ljuwézrele, naca na tu zria da ba nabágale. ¿Bizr chee na' quebe dxucá'anale na cá'aze? ¿Bizr chee na' quebe dxuele lataj nu benne' cuane' chee le?

<sup>8</sup> Le'e dxunle da quebe naca na xrlátaje, ne dxe-banle, na' dxunle caní chee bi bíchele.

<sup>9-10</sup> ¿Quebe nézele le'e, quebe xelexú'u benne' wen da calela naga dxenná bea Dios? Quebe güele lataj nu si xē le'e. Quebe xelexú'u naga dxenná bea Dios benne' ca' dxelune' da sban, ne benne' ca' dxelúe lá'ane' bedáu' xiaj xaga, ne benne' ca' dxelezúalene' zru'ula benne' xula, ne benne' ca'

dxeledálene' ljwezre biue', ne benne' gubán ca', ne benne' wecude' ca', ne benne' ca' dxelé'aje', ne benne' ca' dxulutupe' dizra' bizruj, ne benne' ca' dxulucache lane'.

11 Caní gúcale bál-lale le'e, san na'a bache bexádxele lu xichaj lázrdaule, ne nuzúa cuínale lu na' Dios, na' nazí' lu ne'e le'e lu La Xránadxu Jesús ne chee Be' Lá'azxa chee Dios cheedxu.

### *Naca lá'azxa bēla' dxen cheedxu*

12 Da li naca da dxelenné': Nápadxu lataj gundxu da dxaca lazre' tu tudxu. Quegá xúgute na naca na da ba neza. Awe', napa tu benne' lataj gune' da dxaca lazre', san quebe dxal-la' gu'e lataj bi da nna be'e na le'.

13 Naca da li da dxelenné': Xela wagu naca na chee le'edxu, na' le'edxu naca na chee xel-la wagu, san Dios gusexuzre' dxúpatē na. Quebe naca bēla' dxen cheedxu chee gun na da sban. Bēla' dxen cheedxu naca na da gunézrujdxu chee Xránadxu, na' Xránadxu naque' Bēneea' guchínene' bēla' dxen cheedxu lu da xrlátaje.

14 Ca ben Dios bsebane' Xránadxu ládujla benne' gate ca', cá'aqueze gusebane' dxi'u nen xel-la waca chee'.

15 ¿Quebe nézele le'e bēla' dxen chee naca na chee Cristo? ¿Wacá'a tu da naca na bēla' dxen chee Cristo, ne guchaga' na nen bēla' dxen chee tu nu'ula wen da sban? ¡Cabata'!

16 ¿Quebe nézele le'e gate tu benne' biu dxuchague' tu nu'ula wen da sban dxúpatē' zaj naque' ca tuze bēla' dxen? Naxúaj lu dizra' lá'azxa da dxenná na: Dxúpatē' xelexaque' tuze bēla' dxen.

17 Gate tu benne' dxuchague' Xránadxu, dxelex-  
aque' tuze be'.

18 Le guzrunnaj chee da sban. Zaj nita dul-la  
xula da dxun benne' da quebe dxulucá'ana ditaj  
na bela' dxen chee', san benne' dxuchague' nu'ula  
quebe naca zru'ule' dxune' dul-la lu bela' dxen  
cheequeze'.

19 ¿Quebe nézele le'e naca bela' dxen cheele xu-  
dau' chee Be' Lá'azxa, Bénnea' nunna Dios le'e, na'  
Be' Lá'azxa zu'e xichaj lázrdaule? Quebe nácale  
xrana bela' dxen cheele,

20 lawe' da guzí' Dios le na nen tu lazruj zrente.  
Chee le na', dxal-la' gápale ba lá'ana Dios nen  
bela' dxen cheele, ne nen be' nácaquezele, lawe' da  
dxúpatē na' zaj naca na chee Dios.

## 7

### *Ca naca chee xel-la dxuchaga na'*

1 Na'a xecheba' ca zaj naca da bchébele neda'.  
Da li naca xrlátaje quebe guchaga na' tu benne'.

2 Lawe' da dxácale'e da sban naga zúale, tu tu  
benne' biu dxal-la' súalene' nu'ula cheequeze',  
na' tu tu nu'ula dxal-la' súalene' benne' biu  
cheequeze'.

3 Benne' biu dxal-la' gune' nen zru'ule' da  
nabague' chee zru'ule', na' cá'anqueze nu'ula dxal-  
la' gune' nen benne' biu chee' da nabague' chee  
benne' chee'.

4 Nu'ula na' quebe naque' xrana bela' dxen  
chee', san naca na chee benne' biu chee'.  
Cá'anqueze benne' biu quebe naque' xrana bela'  
dxen chee', san naca na chee zru'ule'.



<sup>5</sup> Quebe dxal-la' xeledábaga ljwezre', san tuze gate xelezúe' xel-la wezría tu chí'idauze chee xuluzúa cuine' lau Dios chee xuluchálajlene' Le'. Te na' dxal-la' xuluchaga ljwezre' chee quebe seque' Satanás nna be'e na le' che quebe xelezéquene' xelenná be'e cuine'.

<sup>6</sup> Da nigá dxapa' le'e naca na tu da dxue le'e lataj. Quebe naca na tu da nadxixruj bea na.

<sup>7</sup> Neda' dxezá lazra' súałe xúgutele ca zua' neda', san Dios ba nunne' tu tudxu da gaca gundxu. Tu da nunne' tudxu, na' da xula xetudxu.

<sup>8</sup> Dxapa' benne' wegu', ne nu'ula wezebe, naca xrlátaje xelexegá'ane' cá'aze ca zua' neda'.

<sup>9</sup> Che quebe xelezéquene' xelenná be'e cuine', waca xuluchaga ne'e, lawe' da nácadxa xrlátaje xuluchaga ne'e quézcala xeledé' ba xa' lu bela' dxen chee'.

<sup>10</sup> Benne' zaj nuchaga ne'e dxapa' nu'ula quebe gusané' benne' biu chee'. Quebe naca cheeza' da nadxixruj bea nigá, san naca na da dxun Xránadxu.

<sup>11</sup> Che nu nu'ula gusané' benne' biu chee', dxal-la' xegá'ane' cá'aze, u xexaque' tuze nen benne' biu chee' na'. Cá'anqueze benne' biu quebe dxal-la' gusané' zru'ule'.

<sup>12</sup> Dxapa' xezícadxa benne' néda'queza', quegá Xránadxu, che zru'ula tu bi bíchedxu quebe dxéajle'e chee Xránadxu, dxéquene' xrlátaje zúalene' benne' chee', bi bíchedxu na' quebe dxal-la' gusané' le'.

<sup>13</sup> Che benne' biu chee' tu nu'ula zandxu quebe dxéajle'e chee Xránadxu, san dxéquene' xrlátaje zúalene' zru'ule', nu'ula zandxu na' quebe dxal-la' gusané' benne' biu chee' na'.

14 Benne' biu na' quebe dxéajle'e chee Xránadxu naque' ca tu bi chee Dios lawe' da nuchague' zru'ule' dxéajle'e chee Xránadxu, na' nu'ula na' quebe dxéajle'e chee Xránadxu naque' ca tu bi chee Dios lawe' da nuchague' benne' biu chee' dxéajle'e chee Xránadxu. La quebe naca na caní, zrí'inele le'e xelácabe' ca zri'ine benne' quebe zaj naque' chee Dios, san da li zaj nácabe' ca bi chee Dios.

15 Che benne' biu na' u zru'ule', benne' quebe dxéajle'e chee Xránadxu, dxaca lázrtequeze' gusane' ljwezre', waca na. Che caní dxaca chee tu bi bíchedxu u chee tu bi zandxu, nape' lataj lawe' da gunné Dios dxi'u chee cueza zri lázredxu.

16 Che quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

17 Ájateze naca, tu tudxu dxal-la' gundxu ca naca da nunna Xránadxu dxi'u, ne xegá'anadxu cáteze nácadxu gate gunné Dios dxi'u. Caní dxapa' xúgute cue' bi chee Cristo.

18 Che Dios dxenné' tu benne' biu nadxugu lu bela' chee' da dxulé'e na naque' bi chee Dios, benne' nigá dxal-la' xegá'ane' ca', na' che dxenné Dios tu benne' quebe nadxugu lu bela' chee' da na', quebe dxal-la' chugu lu bela' chee' da na'.

19 Quebe bi naca che nadxugu da na' lu bela' cheedxu, u quebe. Da dxun na ba xen naca gundxu da dxaca lazre' Dios.

20 Tu tudxu dxal-la' xegá'anadxu cáteze nácadxu gate Dios dxenné' dxi'u chee gácadxu bi chee'.

21 Che gucu' benne' nada'u gate Dios gunné' lue',

quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na.

<sup>22</sup> Bénnea' guque' benne' nada'u gate gunné Xránadxu le' naque' ca benne' quebe nada'u chee guné' zrin chee Xránadxu, na' cá'anqueze bénnea' quebe naque' benne' nada'u gate gunné Xránadxu le', naque' ca benne' nada'u chee Xránadxu.

<sup>23</sup> Dios ba ná'awe' le'e nen tu lazruj zrente. Quebe güele lataj nu benne' guné' le'e benne' zaj nada'u.

<sup>24</sup> Ca' naca na, bi bicha', tu tudxu dxal-la' xegá'anadxu lau Dios cáteze nácadxu gate gunné' dxi'u.

<sup>25</sup> Ca naca chee benne' ca' quebe zaj nuchaga ne'e quebe bi gunná be'e Xránadxu neda', san dxapa' le'e ca da dxéqueda', na' waca guxrén lázrele neda' lawe' da bexache lazre' Xránadxu neda'.

<sup>26</sup> Dxéqueda' neda' dxal-la' xegá'ana tu benne' biu cáteze naque' lawe' da zúadxu zra stébele'e.

<sup>27</sup> Che nuchagu' nu'ula quebe cuasu' le', na' che quebe nuchagu' nu'ula, quebe guchaga na'u.

<sup>28</sup> Che guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stebe lu zra caní, na' dxaca lazra' quebe súale stebe caní.

<sup>29</sup> Bi bícha'dau', da nigá dxaca lazra' xapa' le'e. Xelátega ne de súadxu lu xezr la xu nigá. Ná'atela benne' zaj nuchaga ne'e dxal-la' guné' da naca chee Cristo ca dxelún benne' quebe zaj nuchaga ne'e.

<sup>30</sup> Benne' dxelebezre xache' dxal-la' xelune' da naca chee Cristo ca dxelún benne' quebe zaj naque' baxache'. Benne' zaj zra' laní dxal-la'

xelune' da naca chee Cristo ca dxelún benne' quebe zaj zue' xel-la dxebé, na' benne' dxelá'awe' dxal-la' xelune' da naca chee Cristo ca dxelún benne' quebe zaj nape' da na' dxelá'awe'.

<sup>31</sup> Benne' dxelezi'e ba neza lu xezr la xu nigá dxal-la' xelune' da naca chee Cristo ca dxelún benne' quebe dxelezi'e ba neza na, lawe' da ba dxexuzre lazre' xezr la xu nigá.

<sup>32</sup> Dxaca lazra' quebe bi cue'le gunne xue. Gate tu benne' biu nácabe' wegu' dxe'ebe' gunne xue da naca chee Xránadxu chee gunbe' da dxezaca ba lazre' Xránadxu.

<sup>33</sup> Gate ba nuchaga ne'e, dxe'e gunne xue da naca chee xezr la xu nigá chee guné' da dxezaca ba lazre' zru'ule'.

<sup>34</sup> Cá'anqueze dxaca chee nu'ula zua benne' biu chee', ne nu'ula wegu'. Nu'ula wegu' dxe'ebe' gunne xue da naca chee Xránadxu chee chu'ube' lu na' Dios duté be'la' dxen cheebe', ne duté be' cheebe', san nu'ula zua benne' biu chee' dxe'e gunne xue da naca chee xezr la xu nigá chee guné' da xezaca ba lazre' benne' chee'.

<sup>35</sup> Dxapa' le'e da nigá chee gaca chawe' cheele, ne quebe chee nna be'eda' le'e, san chee gunle da xrlátaje, ne da li, chee chu'ule du lázrele lu na' Xránadxu.

<sup>36</sup> Che nu benne' dxéquene' nácadxa xrlátaje guchaga na' zr'ine' nu'ula lawe' da ba dxedé xel-la cuide' cheebe', ne naca da dxal-la' gunbe', dxal-la' guné' da dxéquene' naca xrlátaje. Waca guchaga na'abe'. Quebe naca na dul-la.

<sup>37</sup> Che nu benne' quebe dxéquene' dxun na ba xen, ne che nape' lataj guné' da dxaca lazre', ne

che ba nune' lu xichaj lászrdawe' xegá'ana zrí'ine' nu'ula wegu', dxune' da xrlátaje.

<sup>38</sup> Ca' naca na, benne' dxu'e lataj guchaga na'abe' zrí'ine' nu'ula, dxune' da xrlátaje, na' bènea' quebe dxu'e lataj dxune' da nácadxa xrlátaje.

<sup>39</sup> Nu'ula zua benne' biu chee' nuchague' bènea' ne chee da nadxixruj bea na dxácatę ne zue' nabanę', san che gate benne' chee', de lataj nu'ula na' guchaga ne'e nen núteteze benne' biu, san dxun na ba xen dxéajle'e chee Xránadxu.

<sup>40</sup> Gácadxa chee' da ba neza che xegá'ane' cá'aze. Caní dxéqueda' neda', ne dxéqueda' dxun Be' Lá'azxa chee Dios neda' tuze.

## 8

*Xel-la wagu da zaj nuzúa bèneache lau bedáu' xiaj xaga*

<sup>1</sup> Na'a guchálaja' ca naca chee xel-la wagu da zaj nuzúa bèneache lau bedáu' xiaj xaga. Da li xúgutedxu nápadxu xel-la dxéajni'i ca naca da nigá. Xel-la dxéajni'i dxun na dxi'u benne' dxulucá'ana szren cuina, san xel-la zri'i lazre' dxusegula na dxi'u lu xel-la dxeajlí lazre' cheedxu.

<sup>2</sup> Che nu benne' dxéquene' nape' dute xel-la dxéajni'i, quebe ne chéajni'ine' ca dxal-la' chéajni'ine'.

<sup>3</sup> Che nu benne' nazrí'ine' Dios, Dios ba nazí' lu ne'e bènea'.

<sup>4</sup> Na'a, ca naca chee xel-la wagu da zaj nuzúa bèneache lau bedáu' xiaj xaga, nezdxu quebe bi naca tu bedáu' xiaj xaga lu xęzr la xu nigá, ne tuze Bènea' naque' Dios.

<sup>5</sup> Lácala zaj zra' xabáa, ne xezr la xu nigá da zante da dxeleque bèneache zaj naca na dios, ne chee benne' caní zante dios zaj zra na, ne zante xrane' zaj zra na,

<sup>6</sup> cheedxu dxi'u che nácadxu chee Cristo, tuze Bénnea' naque' Dios, Bénnea' naque' Xradxu. Xradxu Dios bene' xúgute da de, na' dxi'u zúadxu chee guchíne' dxi'u. Cá'aqueze tuze Bénnea' naque' Xránadxu, Jesucristo. Ne chee Le' guzrá' xúgute da de, na' zúadxu dxi'u ne chee Le'.

<sup>7</sup> Quegá xúgute bi chee Cristo zaj nézene' da nigá. Bal-la benne' caní gulú'u lawe' belúe lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na chee bedáu', na' lawe' da quebe zaj ze chache' lu xichaj lázrdawe', dxeléquene' zaj nabague' zria ne chee da dxelawe'.

<sup>8</sup> Da na' dxágudxu quebe dxucá'anadxa na dxi'u xrlátaje lau Dios, lawe' da quebe nácadxadxu xrlátaje che dxágudxu, ne quebe nácadxadxu calēla che quebe dxágudxu.

<sup>9</sup> Le guxúe xanne' cuínale ca naca lataj da nápane bi gágule chee quebe guzría xile tu benne' quebe ze chache' lu xel-la dxeajlí lazre' chee'.

<sup>10</sup> Ca' naca na, che lue' nézenu' da nigá, na' che cue'u gagu' tu naga zra' bedáu' xiaj xaga, na' che tu bi bíchedxu, benne' quebe ze chache' lu xel-la dxeajlí lazre' chee', lé'ene' lue' dxe'u dxagu' na', na' bi bíchedxu na' wexázrquezne' cue'e gawe' da na' zaj nuzúa bèneache lau tu dios quebe bi naca.

<sup>11</sup> Ca' naca na, lue', lawe' da napu' xel-la dxéajni'i, guzría xi'u tu bi bichu' quebe ze chache' lu xel-la dxeajlí lazre' chee', na' naque' benne' gute Cristo

waláz chee'.

<sup>12</sup> Ca' naca na, gate dxuzría xile bi bíchedxu quebe zaj ze chache' lu xel-la dxelejli lazre' chee', dxunle dul-la da dxuzúa Crístoqueze chala'ala.

<sup>13</sup> Chee le na', che guzría xi'a tu bi bicha' ne chee da dxawa', nácadxa chawe' cabátadxa gawa' bela' chee quebe guzría xi'a le'.

## 9

### *Da naca chee tu benne' gubáz chee Cristo*

<sup>1</sup> Naca chia' naca' gubáz chee Cristo, ne napa' lataj bi guna' lawe' da ble'eda' Xránadxu Jesús, na' nácale le'e bi chee Cristo ne chee zrin bena' chee'.

<sup>2</sup> Che dxeleque xezícadxa benne' quebe naca' gubáz chee Cristo, san dxun na ba xen guéquele le'e naca' gubáz chee' lawe' da dxunna bea da nácale chee Xránadxu da li naca' gubáz chee'.

<sup>3</sup> Da nigá naca na da dxapa' benne' ca' dxelezi tizre' neda':

<sup>4</sup> Naca chia' si' lu na'a da xi'aj gawa' ne chee zrin da dxuna'.

<sup>5</sup> Cá'anqueze naca chia' guchaga na'a tu nu'ula zandxu chee chéajlene' neda' ca dxelún xezícadxa benne' gubáz chee Cristo, ne benne' bíchequeze Xránadxu, ne Pedro.

<sup>6</sup> ¿Dxéquele tuze Bernabé, ne neda' dxal-la' guntu' zrin chee gata' da xi'aj gáguntu' gate dxuzéntenú' bénneache dizra' chawe'?

<sup>7</sup> ¿Nuzra benne' gaque' benne' zeje' wedil-la che quebe nu quizruj le'? ¿Nuzra benne' dxaze' lba uva che quebe gawe' na? ¿Nuzra benne' gusegule' zrila' che quebe xequé'e xicha zraba'?

8 Quebe dxal-la' guéquele dxapa' le'e da nigá néda'queza', lawe' da caníqueze dxenná na lu da bdxixruj be'e Moisés.

9 Naxúaj lu da nadxixruj bea na da dxenná Dios: Quebe cu'ule xixruj dxu'a bezre, be dxíchuba' zrua' xtila. Quebe gunná Dios da nigá lawe' da dxue lazre' chee bezre cá'aze.

10 Gunné' na ne cheedxu dxi'u. Naxúaj da nadxixruj bea nigá chee gaca da ba neza cheedxu, lawe' da benne' dxugá'ane' bezre, ne benne' dxine' dxal-la' xebebeza lazre' xelexezi'e ca naca da gunna lina da xelaze'.

11 Na'a, che netu' ba gúzantu' lu xichaj lárdaule da naca na chee Be' Lá'azxa, ¿quebe dxal-la' si' lu na'ntu' látédauze da naca chee lu xezr la xu nigá?

12 Che xezícadxa benne' naca chee' xelexí' lu ne'e da naca chee, ¿gáradxa netu'?

Quebe ne guchínetu' da nigá naca na cheentu'. Bchaga launtu' xúgutę chee quebe guzágantu' ca naca dizra' chawe' chee Cristo.

13 Ba nézele benne' dxelune' zrin chee xudau' dxelawe' chee da xu'u lu xudau' na', na' benne' dxelune' zrin chee lu cugu naga dxelutie' be xixre'du ca' lau Dios dxelawe' bela' chee béadu ca'.

14 Cá'aqueze ba nun Xránadxu chee benne' dxuluchalaje' dizra' chawe', xelexí'e ba neza zrin da dxelune'.

15 Cabata' guchíneda' netú da caní zaj naca na chia', ne quebe dxuzúaja' da nigá chee gúnnale neda' late'. Gaca lázredxa' gatia' quézcala nu gucuasa da ba neza da napa'.

16 Quebe dxal-la' gucá'ana szren cuina' lawe' da dxuzenda' bèneache dizra' chawe' chee Cristo,



lawe' da dxun na ba xen guna' na. Baxache' naca' che quebe guzenda' bénneache dizra' chawe' nigá.

17 Chee le na', che dxuna' na lawe' da naca na da dxaca lazra' guna', ba de lazruj chia'. Na'a, che dxuna' na xadíaze, naca na tu da nusebaga Dios neda'.

18 Ca' naca na, lazruj da dxezi'a naca na da ba neza napa' gate dxuzenda' bénneache dizra' chawe' chee Cristo, ne quebe bi dxuchíruja' benne' ca'. Ca' naca na, quebe dxuchíneda' da naca na chia' lawe' da dxuna' zrin nigá.

19 Lácala quebe naca' benne' nada'u chee nu benne', ba nun cuina' ca tu benne' nada'u chee xúgute bénneache, chee séqueda' cu'a benne' zandxa lu na' Cristo.

20 Gate zua' ládujla benne' judío ca', dxun cuina' benne' judío chee cu'a le' lu na' Cristo. Ca' naca na, ládujla benne' zaj xu'e lu na' da nadxixruj bea na dxun cuina' ca tu benne' xu'e lu na' da nadxixruj bea na, chee cu'a le' lu na' Cristo lácala da li quebe xu'a lu na' da nadxixruj bea na na'.

21 Xetú na'a, chee séqueda' cu'a lu na' Cristo benne' ca' quebe zaj xu'e lu na' da nadxixruj be'e Moisés, dxun cuina' ca tu benne' quebe xu'e lu na' da nadxixruj bea na na', lácala da li xu'a lu na' da nadxixruj bea na chee Dios lawe' da xu'a lu na' da nadxixruj bea na chee Cristo.

22 Gate zua' ládujla benne' ca' quebe zaj ze chache' lu xel-la dxeajlí lazre' chee dxun cuina' ca zaj naca benne' ca' chee séqueda' cu'a le' lu na' Cristo. Ca' naca na, dxun cuina' ca naca tu tu benne' ca' chee ájatezla séqueda' cu'a bal-la benne' ca' lu na' Cristo.

<sup>23</sup> Dxuna' xúgute da nigá ne chee dizra' chawe' chee Cristo chee gapa' tu da ba neza chee na.

<sup>24</sup> Ba nézquezle le'e tu lu da huitaj benne' zan dx-esí'aca chégüe' na' tuze' dxezrué'ene' lataj blau. Le sa'aca chegu le'e chee zrué'ele da dxunna Cristo.

<sup>25</sup> Xúgute benne' ca' dxulupá'a cuine' chee xelu'e da huitaj, dxuluzúe' chalá'ala xúgute da dxun na calela chee'. Benne' caní dxelune' da caní chee xezezi' lu ne'e tu da guzúe' xíchaje' da naca na laga' da québequeze si bea, san dxi'u dxundxu zrin chee zrué'edxu da zeajlí canna.

<sup>26</sup> Neda' quebe dxezá chégua' ájatezla, ne quebe dxedil-la' ca tu benne' dxu'e lu be'ze gate dxedil-le'.

<sup>27</sup> Neda' dxudéa' xel-la zi' be'la' dxen chia', ne dxenná be'eda' na, chee quebe gunitia' neda' da naca chia' lu zrin nigá, ca te na' ba bsédeda' benne' xula ca'.

## 10

*Da dxuzéajni'i na dxi'u ca naca chee bedáu' xiaj xaga ca'*

<sup>1</sup> Dxaca lazra' nézele, bi bícha'dau', ca guca chee xra xrtáudxu ca' xjácálene' Moisés. Dios guché'e xúgute benne' ca' ne chee beuj bza na', na' xúgute' guledé'e ládujla nísadau' da nazí le na Xrna.

<sup>2</sup> Ca' naca na, waca nnadxu xúgute' beledxúe' nisa lu nísadau' na', ne gulaque' tuze nen Moisés gate guledálene' beuj bza na'.

<sup>3</sup> Cá'anqueze xúgute' gulawe' tuze xel-la wagu da bnezruj Dios le',

<sup>4</sup> ne gule'aj xúgute' tuze nisa da bnezruj Dios le', lawe' da gulé'aje' nisa na' bedxúaj na xiaj xre

na'. Xiaj xre nigá dxulé'e na ca naca Crístoqueze, Bénnea' guxéajlęne' benne' ca' lę'e xixre' lawe' lataj na'.

<sup>5</sup> Benne' zan benne' ca' quebe belunę' da bezaca ba lazre' Dios, na' cheę lę na' gulatie' lę'e xixre' lawe' lataj.

<sup>6</sup> Xúgute da caní guca na cheę guzėjajni'i na dxi'u cheę quebe sa lázredxu da caleła ca', ca belún benne' ca'.

<sup>7</sup> Cheę lę na' quebe gucá'ana szrenle bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawę' lau bedáu' xiaj xaga, na' belexasę' cheę buluxé'e.

<sup>8</sup> Quebe dxal-la' gundxu da sban ca belún bal-la benne' ca', na' tu zraze gulate chupa gaxúa chi dxua gaxuę'.

<sup>9</sup> Quebe dxal-la' guchínedxu xel-la zren lazre' cheę Xránadxu cheę gundxu da caleła ca belún bal-la benne' ca', na' gulatie', gate gulí'ina belá' lę'.

<sup>10</sup> Quebe nnele cheę Dios ca gulenné bal-la benne' ca', na' gubáz cheę xabáa cheę xel-la gute bęte' benne' ca'.

<sup>11</sup> Xúgute da caní gulezaca xra xrtáudxu, na' zaj naxúaj na lu dizra' lá'azxa cheę guzėjajni'i na dxi'u, zúadxu lu zra bzebe caní.

<sup>12</sup> Ca' naca na, nu benne' dxéquene' ze chache' lu da naca cheę Dios dxal-la' guxúe xanne' cuine' cheę quebe cheajcházie'.

<sup>13</sup> Da dxelún zréaje le'e naca na tuze ca da dxelún zréaje xúgute bénneache, na' waca guxrén lázrele Dios lawe' da quebe gu'e lataj bi gun zréaje le'e da quebe séquele guchaga laule, na' gate gaca tu da

gun zréaje na le'e, Dios gunne' le'e ájala gunle chee lale lu da na', chee séquele guchaga laule na.

14 Chee le na', bi bicha' nazri'ite lazra', québedxa gucá'ana szrenle bedáu' xiaj xaga ca'.

15 Dxuchálajlena' le'e ca dxuchálajlena' benne' dxeléajni'ine', na' lé'equeze waca guchi'ale chee da dxapa' le'e.

16 Gate dxágadxu da dxucube na ca guca gate gute Xránadxu, dxápadxu ba lá'ana Dios. Gate dxí'ajdxu xrisa uva lá'azxa, da nigá dxulé'e na dx-ezidxu ba neza dxen chee Cristo da gulalaj na le'e xaga béguaj. Xeta xtila na' da dxuzúzrujdxu dxulé'e na xezidxu ba neza bela' dxen chee Cristo da bdee' waláz cheedxu le'e xaga béguaj.

17 Lácala naxandxu, xúgutedxu dxágudxu tu xeta xtílaqueze da naca na tuze, da na' dxulé'e na nácadxu ca tuze bela' dxen chee Cristo.

18 Le nna'xque ca zaj naca benne' Israel ca'. Benne' caní, benne' dxelawe' da dxuluzré'e lu cugu chee Dios dxelezi'e ba neza lu cugu na'.

19 Quebe dxennía' naca tu bedáu' xiaj xaga tu da zaca, na' bela' da dxuluzría bèneache lau bedáu' xiaj xaga quebe zácadxu ca bíteteze xetú bela'.

20 Dxennía' da dxuluzría lau bedáu' xiaj xaga benne' ca' quebe zaj núnbe'e Dios, dxuluzríe' na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'.

21 Quebe gaca xí'ajle da na' dxulé'e na nácale Xránadxu tuze, ne xí'ajtele da gulé'e na nácale tuze be' xriwe' ca', ne quebe gaca gágule da naca na chee Xránadxu, ne gágutele da naca na chee be' xriwe' ca'.

22 ¿Dxaca lázrele xewine lazre' Xránadxu lawe' da dxusandxu Le'? ¿Dxéquele le'e nácadxu benne' wáladxa ca Le'?

*Da naca cheędxu gundxu, ne ca naca xel-la zri'i lazre'*

23 Da li naca da na' dxelenná bėnneache, dxelenné': Naca chia' guna' da dxaca lazra'. Quegá xúgute naca na da sidxu ba neza. Naca cheę nu benne' gunę' ca dxaca lazre' san quegá xúgute gusegula na le' lu xel-la dxeajlí lazre' cheę'.

24 Dخال-la' gundxu da gaca chawe' cheę benne' xula, ne quegá da gaca na chawe' cheęzedxu.

25 Le gagu le'e ca naca da dxeda'u lawe' xi'a, ne quebe naba xúzrele cheę na cheę quebe sua stębe xichaj lázrdaule,

26 lawe' da zaj naca cheę Xránadxu xęzr la xu nigá, ne xúgute da ca' zaj zra' lu xęzr la xu.

27 Che nu benne', benne' quebe dxéajle'e cheę Xránadxu, dxenné' le'e gágule xeta, na' che dxaca lázrele chéajle, le gagu xúgute da guzríe' laule, ne quebe naba xúzrele cheę na cheę quebe sua stębe xichaj lázrdaule.

28 Che nna nu benne' zúale le'e, na' xę'e le'e: “Bela' nigá bache guzría na lau bedáu' xiaj xaga”, quebe gágule na, cheę quebe guzúale stębe bėnnea' gunné' ca', ne cheę quebe sua stębe xichaj lázrdaule.

29 Dxennía' da nigá cheę xichaj lázrdau benne' zúalene' lue', ne quegá cheę xichaj lázrdau' lué'queze.

Waca naba xuzre tu benne': “¿Bizr cheę na' dxuchi'u da naca chia' lawe' da sua stębe xichaj lázrdau benne' xula?

<sup>30</sup> Che dxapa' Dios: Xcalenu' chee da dxawa', ¿bizr chee na' xelezí tizre' neda' chee da dxawa'?"

<sup>31</sup> Chee le na', che dxágule u dxí'ajle, u bíteteze da dxunle, le gun xúgute chee gaca ba Dios.

<sup>32</sup> Quebe bi gunle da guzúa na stebe benne' xula, quegá benne' judío ca', ne quegá benne' quebe zaj naque' judío, ne quegá nu benne' naque' bi chee Dios.

<sup>33</sup> Neda' dxuna' ba xuzre guna' da xelezaca ba lazre' xúgute bénneache ca naca xúgute da dxuna'. Quebe dxuna' da gaca chawe' cheeza' san da gaca chawe' chee xezícadxa bénneache chee xelelé'.

## 11

<sup>1</sup> Le gun ca dxuna' neda', ca neda' dxúnqueza' ca ben Cristo.

*Da dxelún nu'ula naga zaj nazraga bi chee Cristo*

<sup>2</sup> Bi bicha', dxapa' le'e ba lá'ana lawe' da dxeajsá lázrequezle neda', ne dxunle ca naca da bzéajni'ida' le'e.

<sup>3</sup> Na'a dxaca lazra' chéajni'ile naca Cristo xíchaje chee tu tu benne' biu, na' benne' biu naque' xíchaje chee zru'ule', ca naca Dios, naque' xíchaje chee Cristo.

<sup>4</sup> Che tu benne' biu gugácue' xíchaje' gate dxuchálajlene' Dios naga zaj nadupa bi chee Cristo, u gate dxuchálaje' waláz chee Dios, naca na tu xel-la stu' chee Bénnea' naque' xíchaje'.

<sup>5</sup> Che tu nu'ula quebe gugácue' xíchaje' gate dxuchálajlene' Dios, u gate dxuchálaje' waláz chee Dios, naca na tu xel-la stu' chee', lawe' da dxun cuine' ca tu benne' biu. Lébezqueze naca na chugue' xíchaje'.

<sup>6</sup> Che tu nu'ula quebe gugacu xíchaję', nácadxa xrlátaje chugue' tu chi'ize ca naca xicha xíchaję'. Na' che naca na tu xel-la stu' cheę nu'ula che chugue' xíchaję', u che guzúę' zrígaze xíchaję' ca dxun tu benne' biu, dxal-la' gugacu xíchaję' naga zaj nazraga bi cheę Cristo.

<sup>7</sup> Benne' biu quebe dxal-la' gugacu xíchaję' lawe' da naque' lu'a le saca Dios, na' da naque' dxulé'e na ca naca xel-la szren cheę Dios. Da naca nu'ula dxulé'e na ca naca xel-la szren cheę benne' biu.

<sup>8</sup> Gate ben Dios benne' biu, quebe bi guléaję' le' lu bęla' dxen cheę nu'ula, san guléaję' lu bęla' dxen cheę benne' biu da na' bexune' nu'ula na'.

<sup>9</sup> Dios bene' nu'ula na' cheę nna be'e benne' biu le', ne quegá bene' benne' biu cheę nna be'e nu'ula le'.

<sup>10</sup> Cheę le na' nu'ula dxal-la' guzúę' xíchaję' tu da dxulé'e na zua nu dxenná be'e le' cheę quebe gun zrėjene' gubáz cheę xabáa ca' cheę Dios.

<sup>11</sup> Lu da nácadxu cheę Cristo, benne' biu dx-echinne' nu'ula, ne cá'aqueze dxechín nu'ula benne' biu.

<sup>12</sup> Da li Dios guléaję' nu'ula na' lu bęla' dxen cheę benne' biu, na' cá'aqueze benne' biu dxálaję' cheę nu'ula, na' xúgutedxu zadxu lu na' Dios.

<sup>13</sup> Le nna'xque le'e che naca xrlátaje che tu nu'ula guchálajlene' Dios, ne quebe gugacu xíchaję'.

<sup>14</sup> Da nácaquezdxu dxulé'e na dxi'u naca tu xel-la stu' che benne' biu se tunna xicha xíchaję',

<sup>15</sup> na' naca tu da ba lá'ana cheę nu'ula se na tunna, lawe' da nunna Dios le' xicha xíchaję' tunna cheę gugacu na xíchaję'.

16 Na'a che nu benne' dxaca lazre' gutil-le' dizra' ca naca da nigá, dxal-la' nézene' quegá dxi'u ne quegá benne' zaj nazraga chee Cristo quebe núnbeadxu xetú da xula.

*Da dxelún benne', gate dxelawe' da naca chee Xránadxu*

17 Ca naca chee da nigá quebe dxapa' le'e ba lá'ana lawe' da dxaca da calēla chee gate nazrágale, ne quegá da chawe'.

18 Da nédxuteca, dxulé'e neda' gate dxezrágale chee güe lá'anale Dios nácale chupa la'a. Dxéqueda' naca da li da dxelenné'.

19 Dxál-la'queze gácale chupa la'a chee gulé'e lawe' nu benne' ládujla le'e da li naque' bi chee Cristo.

20 Chee le na' gate dxezrágale le'e chee gágule da naca chee Xránadxu, da li québedxa naca na chee Xránadxu.

21 Gate dxezrín zra dxágule, tu tule le'e dxebía lau chee dxecá'ale xel-la wagu cha chee, na' bál-lale le'e dxegá'anale dxedunle, na' xezícadxale dxezúzrele.

22 ¿Quebe bi de chee naga xi'aj gágule? Ca'an dxunle, dxuzúale chalá'ala bi ca' chee Dios, ne dxugu'ule xel-la stu' benne' ca' quebe bi de chee'. ¿Bízraqueze xapa' le'e? ¿Dxal-la' gapa' le'e ba lá'ana? ¡Cabata'!

*Da dxágudxu da naca chee Xránadxu*

*(Mt. 26.26-29; Mr. 14.22-25; Lc. 22.14-20)*

23 Xránaquezdxu bzéajni'ine' neda' da nigá bsédeda' le'e: Lu zre' ná'queze gate Judas bdee' Xránadxu Jesús lu na' benne' guledábague' Le', na' Jesús guqué'e xeta xtila,



24 na' gudé guzre' Dios: Xcalenu', bzúzruje' na, na' gunné': "Le gagu. Xeta xtila nigá dxulé'e na ca gaca chee bel-la' dxen chia' lu da na' saca zi'a waláz chee. Le gun da nigá chee cheajsá lázrele neda'."

25 Cá'anqueze, gudé gulawe', guqué'e xrisa uva, na' gunné': "Xrisa uva nigá dxulé'e na ca naca da dxuzé chacha na xel-la wezría cube da naca na dxen chia'. Tu tu lasa xí'ajle na, le gun na chee cheajsá lázrele neda'."

26 Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu lasa gate gágule xeta xtila nigá, ne xí'ajle xrisa uva nigá.

### *Ca dxal-la' gágudxu da naca chee Xránadxu*

27 Ca' naca na, núteteze benne' gawe' xeta xtila nigá, u xí'aje' xrisa uva chee Xránadxu, ne quebe dxape' ba lá'ana na, na' dxune' dul-la da dxuzúa bela' dxen chee Xránadxu chalá'ala.

28 Chee le na' tu tudxu dxal-la' guxúe xánnedxu xichaj lázrdaudxu gate za gágudxu xeta xtila nigá, ne za xí'ajdxu xrisa uva nigá,

29 lawe' da che xi'aj gágudxu, ne quebe dxéquedxu dxulé'e na ca naca bela' dxen chee Xránadxu, na' da xi'aj gágudxu gun na bágadxu zria.

30 Chee le na' benne' zan ládujla le'e quebe chawe' zaj zue', ne zaj nate ni'a ne'e, na' bal-la benne' ládujla le'e ba gulate'.

31 Che guxúe xanne' cuínadxu, quebe gun na ba xen guchi'a Xránadxu cheedxu caní.

32 Gate Xránadxu dxuchi'e cheedxu, dxudé' dxi'u xel-la zi' chee quebe cuía xidxu nen benne' zaj zre'e xezr la xu nigá.

<sup>33</sup> Ca' naca na, bi bicha'. Gate dxezrágale chee gágule da naca chee Xránadxu, le cueza ljuwézrele tule xetule chee bi gágule.

<sup>34</sup> Che núlale dxedunle, le gagu lu xu'u lízrquezle, chee quebe gun na ba xen guzría xi' Dios le'e gate na' nazrágale. Xezícadxa da ca' dxelaca cheele gucá'ana' chawe' gate xida' xedajnná'a le'e.

## 12

*Xel-la waca ca' da dxunna Be' Lá'azxa tu tudxu dxi'u*

<sup>1</sup> Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

<sup>2</sup> Ba nézquezle gate na' quebe ne chéajlele chee Xránadxu, be'ele lataj gulezrube xue' le'e chee xeajé lá'anale bedáu' xiaj xaga ca', da quebe dxelenné na.

<sup>3</sup> Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

<sup>4</sup> Zaj nazrá' xel-la waca ca' da gaca si' lu nnadxu, q san tuze naca Be' Lá'azxa, Bénnea' dxunne' dxi'u na.

<sup>5</sup> Zaj nazrá' ca gaca gundxu zrin, san tuze naca Xránadxu, Bénnea' dxundxu zrin chee'.

<sup>6</sup> Zaj nazrá' ca da gaca gundxu, san tuze naca Dios, Bénnea' dxunne' dxi'u xel-la waca gundxu na.

<sup>7</sup> Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutedxu.

8 Ne chee Be' Lá'azxa dxunne' bal-la benne' xel-la waca xuluchálaje' dutē xel-la sina, na' xebal-le' ne chee Be' ná'queze dxunne' le' xel-la waca xuluchálaje' dutē xel-la naxéajni'i.

9 Xebal-le' dxelezi'e xel-la dxeajlí lazre' ne chee Be' ná'queze, na' xebal-le' dxelezi'e xel-la waca chee xelexunē benne' wē' ca'.

10 Xebal-le' dxelezi'e xel-la waca xelunē' xel-la waca ca' chee xabáa, na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézene' nu be' dxuchalāj na lu dxu'a bēneache.

Xebal-le' dxelezi'e xel-la waca xuluchálaje' dizra' nazrá', da quebe naca xrtízrqueze', na' xebal-le' dxelezi'e xel-la waca xuluxuzájle'e dizra' nazrá' na'.

11 Xúgute da caní dxun tuze Be' ná'queze, Bēnea' dxunne' cha cheedxu xel-la waca caní cáteze da dxaca lázrequeze'.

### *Xúgute dxu nuchágadxu tuze bela' dxen*

12 Zua cheedxu tu bela' dxen da napa na zánete cue'. Dxi'u, dxéajledxu chee Cristo, nácadxu ca tuze bela' dxen chee Cristo.

13 Xúgute dxu dxi'u, che nácadxu benne' judío, u benne' quebe nácadxu judío, ne che nácadxu benne' zaj nada'u, u benne' quebe zaj nada'u, gate gudxúadxu nisa da dxulé'e na nácadxu Cristo tuze, cá'anqueze bexácadxu ca tuze bela' dxen, da na' ben tuze Be' Lá'azxa, na' Diosqueze benne' dxi'u lataj sidxu tuze Be' ná'queze.

14 Tu bela' dxen quebe naca na tu cue'ze, san naca na zane' cue'.

15 Che ní'adxu nna na: Quebe naca' na'u, ne chee le na' quebe naca' chee bela' dxen chiu', quegá da ni gun na québedxa naca na chee bela' dxen na'.

16 Na' che nágadxu nna na: Quebe naca' lau', ne chee le na' quebe naca' chee bela' dxen chiu', quegá da ni gun na québedxa naca na chee bela' dxen na'.

17 Che dute bela' dxen cheedxu naca na laudxu, ¿ájazra gundxu xendxu? Che dute bela' dxen cheedxu naca na nágadxu, ¿ájazra gundxu lé'edxu?

18 Dios nuzúe' cha chee cue' bela' dxen na' naga dxaca lazre' Le'.

19 Che dute na' naca na tuze cue', ¿gazra zúaqueze bela' dxen na'?

20 Ca naca na, lácala naca na zane' cue', tuze bela' dxen naca na.

21 Xia laudxu quebe dxal-la' xe na nadxu: Quebe nachinda' lue', ne quebe dxal-la' nna xíchajdxu, xe na ní'adxu: Quebe nachinda' le'e.

22 Da naca na, da zaj naca chee bela' dxen cheedxu da dxéquedxu quebe zaj nácateca na blau, zaj naca na da dxechínedxadxu,

23 Da zaj naca na chee bela' dxen cheedxu da quebe dxápadxu ba lá'ana zaj naca na da dxugacu xánnedxadxu. Da ca' dxéquedxadxu quebe dxal-la' gulé'edxu zaj naca na da dxucáchedxu,

24 da quebe dxun na ba xen gundxu chee da ca' gaca gulé'edxu. Ca' naca na, Dios ben'e' bela' dxen cheedxu chee gápadxadxu ba lá'ana da ca' dxéquedxu quebe nácateca na da gápadxu ba lá'ana,

25 chee quebe gaca chupa la'a bela' dxen

cheedxu. Tu tu cue' chee bela' dxen cue' na gunne xue chee ljwezre na.

<sup>26</sup> Che dxedé xel-la zi' tu da naca na chee bela' dxen cheedxu, xúgute da ca' dxeledé na xel-la zi', na' che tu da na' gaca da ba neza chee na, na' xúgute da ca' dxelebé na tu zren.

<sup>27</sup> Ca' naca na, le'e nácale bela' dxen chee Cristo, na' tu tule nácale ca tu tu cue' chee bela' dxen chee' na'.

<sup>28</sup> Ca' naca na, Dios nunézruje' lataj blau chee bal-la benne' ládujla bi chee Cristo. Lu lataj blau nuzré'e benne' gubáz chee' ca', na' lu lataj gudxupe' nuzré'e benne' dxuluchálaje' waláz chee', na' lu lataj guxunne' nuzré'e benne' dxulusédene' bi chee' ca', na' gudé na' nuzré'e benne' dxelune' xel-la waca da za xabáa. Gudé na' nuzré'e benne' ca' dxelexune' benne' we' ca', ne benne' ca' dxelácalene' bi chee' ca', ne benne' ca' dxelenná be'e, ne benne' ca' dxuluchálaje' dizra' nazrá' da quebe zaj nézene'.

<sup>29</sup> ¿Zaj naca xúgute' benne' gubáz chee'? ¿Dxuluchalaj xúgute' waláz chee'? ¿Dxulusede xúgute' bi chee' ca'? ¿Dxelún xúgute' xel-la waca chee xabáa?

<sup>30</sup> ¿Dxelexún xúgute' benne' we' ca'? ¿Dxuluchalaj xúgute' dizra' nazrá' da quebe naca xrtizre'? ¿Dxuluzájla'a xúgute' dizra' nazrá' na'? ¡Cabí!

<sup>31</sup> Le gun ba xuzre si' lu na'le chee Dios xel-la waca ca' da nácadxa chawe'. Na'a gulé'eda' le'e tu da cháwedxa.

## 13

*Xel-la zri'i lazre' li*

1 Che dxuchálaja' dizra' chee benne', ne chee gubáz chee xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na.

2 Che dxuchálaja' waláz chee Dios, ne che nezda' xúgute da zaj nagache, ne dxéajni'ida' xúgute da dxelaca, ne napa' xel-la dxeajlí lazre' chee séqueda' gucuasa' xi'a ca', san che quebe napa' xel-la zri'i lazre' li, quebe nu nácaqueza'.

3 Che quísia' xúgute da de chia', ne che guzúa' bela' dxen chia' chee chezxe na, san che quebe napa' xel-la zri'i lazre' li, quebe bi da ba neza naca na chia'.

4 Bénnea' nape' xel-la zri'i lazre' li:

Naque' zren lazre'.

Naque' zri'i lazre', ne quebe naque' xa lazre'.

Quebe dxucá'ana szren cuine', ne quebe dx-uzécu'e.

5 Quebe dxune' da calela,  
ne quebe naque' zre'e lazre'.

Quebe dxezre'e, ne quebe dxu'u lazre'.

6 Quebe dxebene' gate nu benne' dxeajcházie' lu  
dul-la,  
san dxebene' lu da li.

7 Dxuchaga lawe' xúgute da dxaca nen dute xel-la  
dxeajlí lazre' chee',  
ne dute xel-la dxebeza lazre' chee',  
ne dute xel-la zren lazre' chee'.

8 Xel-la zri'i lazre' li quebe te chee na. Wazrín zra gate québedxa chinedxu nu benne' guchálajlene' dxi'u waláz chee Dios, ne benne' dxéajni'ine' xúgute.

9 Na'a dxéajni'idxu látédauze, ne látédauze dxuchálajdxu waláz chee Dios.

10 Zrin zra gate na' chéajni'idxu dutę ca naca, na' te chee da na' naca na látédauze.

11 Gate ne naca' bidau' bchálaja' ca bidau', ne gulaba lazra' ca bidau', ne bchi'a ca bidau', san gate guca' benne' waca, bzua' chalá'ala da zaj naca chee bidau'.

12 Cá'anqueze na'a quebe dxel'édxu cátequeze, ne da dxel'édxu ze zrul-la, san lu zra na' lé'edxu cátequeze. Na'a látédauze núnbe'a, san lu zra na' gúnbe'a cátequeze ca dxun Dios, núnbe'tequeze neda'.

13 Ca' naca na, xel-la dxeajlí lazre', ne xel-la dxebeza lazre', ne xel-la zri'i lazre' li xelezúaqueze na chadía chacanna, san da blaudxa chee da caní naca na xel-la zri'i lazre' li.

## 14

*Ca naca chee nu benne' dxuchálaje' dizra' nazrá' da quebe naca na xrtizre'*

1 Le gun ba xuzre gápale xel-la zri'i lazre' li, ne cá'anqueze le naba Dios gunne' le'e xel-la waca ca' chee Be' Lá'azxa, ne da naca blaudxa, chee gaca guchálajle waláz chee Dios.

2 Bénnea' dxuchálaje' dizra' nazrá' da quebe naca na xrtizre' dxuchálajlene' Dios, quegá nen bénneache, lawe' da quegá nu dxéajni'i da dxenné'. Dxuchálaje' ne chee Be' Lá'azxa da zaj nagache.

3 Bénnea' dxuchálaje' waláz chee Dios dxuchálajlene' bénneache chee gusegule' benne' ca' lu da naca chee Dios, ne chee ne xúene'-be', ne chee xue zrene'-be'.

<sup>4</sup> Bénnea' dxuchálaję' dizra' nazrá' na' dxusegula cuine', san bénnea' dxuchálaję' waláz cheę Dios dxusegule' bi ca' cheę Cristo lu da naca cheę Dios.

<sup>5</sup> Dxaca lazra' gapa xúgutele xel-la waca guchálajle dizra' nazrá', san dxaca lázredxa' gaca guchálajle waláz cheę Dios, lawe' da nácadxa chawe' guchálajle waláz cheę Dios quézcala guchálajle dizra' nazrá', che quebe zua nu benne' xuzájle'e dizra' nazrá' na' cheę xelegula bi cheę Cristo lu da naca cheę Dios.

<sup>6</sup> Cheę le na', bi bícha'dau', che xida' xedajnná'a le'e, ne guchálajlena' le'e dizra' nazrá', ¿bizra da ba neza gaca na cheęle che quebe guchálajlena' le'e tu da ba ble'e Dios neda', u tu da bzéajni'ine' neda', u tu da guchálaja' waláz cheę Dios, u tu da guzéajni'ida' le'e?

<sup>7</sup> Nná'xquedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chéajni'idxu da dxelenné na, quebe gaca nezdxu ca da dxelul-la na.

<sup>8</sup> Gate dxaca wedil-la, che quebe dxebezre luzu da dxulucuezre' cátequeze, quebe nu se lu wedil-la.

<sup>9</sup> Cá'anqueze dxaca cheęle le'e. Che quebe guchálaja' dizra' da dxéajni'ile, ¿ájazra gaca nézele da dxennía'? Guchálaja' lu be'.

<sup>10</sup> Da zante dizra' nazrá' zaj de lu xęzr la xu nigá, ne da li xúgute na zaj zéaje na.

<sup>11</sup> Na'a che quebe dxéajni'ida' dizra' dxuchálajle tu benne' neda', gaca' ca tu benne' zitu' lau bénnea', na' le' gaque' ca tu benne' zitu' lawa' neda'.

<sup>12</sup> Cheę le na', lawe' da dxaca lázrele si' lu na'le xel-la waca ca' da dxunna Be' Lá'azxa dxi'u, le gun



ba xuzre si' lu na'le da ca' xulusegula na bi ca' chee Cristo lu da naca chee Dios.

13 Ca' naca na, bēnnea' dxuchálaje' dizra' nazrá' dxal-la' naba lau Dios gunne' le' xel-la waca xuzájle'e dizra' nazrá' na'.

14 Che guchálajlena' Dios tu dizra' nazrá'la, da li dxuchálajlena' Le' lu be' nácaqueza', san quebe bi da ba neza naca na chee xel-la dxéajni'i chia'.

15 ¿Bizra da dxal-la' guna' xca'? Dخال-la' guchálajlena' Dios lu be' nácaqueza', ne cá'anqueze nen xel-la dxéajni'i chia'. Dخال-la' gul-la' chee Dios lu be' nácaqueza', ne cá'anqueze nen xel-la dxéajni'i chia'.

16 Che dxue la'anu' Dios tuze lu be' nácaquezu', na' benne' ljwezru' dxenne' chiu' quebe gaca gunne' tu zren lue' gate dxu'u Dios: Xcalenu', lawe' da quebe dxéajni'ine' da dxennáu'.

17 Da dxuchálajlenu' Dios nácale'e na chawe', san bēnnea' dxenne' quebe dxegule' lu da naca chee Dios.

18 Dxapa' Dios: Xcalene' lawe' da dxuchálajdxa' dizra' nazrá' ca xúgutele le'e,

19 san naga zaj nazraga bi chee Cristo dxaca lázredxa' guchálaja' gázxuze dizra' da xeléajni'ibe' chee gusédeda'-be', quézcala guchálaja' chi mila dizra' nazrá' da quebe gaca xeléajni'ibe'.

20 Bi bícha'dau'. Quebe gulaba lázrele ca bidau'. Le gaca ca bidau' chee quebe gunle da calela, san le gaca benne' wal-la chee gulaba lázrele cháwe'dau'.

21 Naxúaj lu xiche lá'azxa chee da dxenná bea Dios, da dxenná na: Guchálajlena' benne' xezr la xu nigá nen dizra' nazrá', ne lu dxu'a benne' zitu'

ca', san ne caní quebe xelenne' chia'. Caní dxenná Xránadxu.

<sup>22</sup> Ca' naca na, xel-la waca chee guchálajdxu dizra' nazrá' naca na tu da dxulé'e na lau benne' quebe dxeléajle'e chee Dios, ne quegá lau benne' dxeléajle'e chee'.

<sup>23</sup> Na'a, gate nazrágale, che xúgutēle dxuchálajle dizra' nazrá', na' che xelexú'u benne' quebe zaj nazédene', u benne' quebe dxeléajle'e chee Dios, ¿quebe xelenné' zaj nadá xichaj lázrdaule?

<sup>24</sup> Na'a che dxuchalaj xúgutēle waláz chee Dios, na' che chu'u tu benne' quebe dxéajle'e chee Dios, u tu benne' quebe nazédene', na' guéquene' nabague' dul-la, na' léqueze' guchi'a cuine' gate xenne' da dxennale xúgutēle.

<sup>25</sup> Ca' gaca na, da zaj nagache xichaj lázrdawe' xululé'e lau na, na' guzúa zribe', ne güe lá'anē' Dios, na' nne' da li zúale Dios le'e.

<sup>26</sup> Ca' naca na, bi bícha'dau', gate dxezrágale, bál-lale le'e nápale salmo ca', ne xebál-lale nápale da gusédele ljwézrele, ne xebál-lale nápale tu da ble'e Dios le'e, ne xebál-lale nápale tu dizra' nazrá' da guchálajle, ne xebál-lale nápale xel-la waca xuzájla'ale dizra' nazrá' na'. Cháwe'dau' naca na, san xúgutē da ca' dxal-la' xulusegula na bi ca' chee Cristo lu da naca chee Dios.

<sup>27</sup> Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájle'e da dxennale.

<sup>28</sup> Na'a che quebe nu chilá' benne' xuzájle'e dizra' nazrá' na', gácadxa chawe' quebe bi da nne' naga nazrágale. Tu tule dxal-la' nnale lé'equenze, ne

nen Dios.

<sup>29</sup> Cá'anqueze benne' dxuluchálaję' waláz cheę Dios waca xelenné' chupa chúnnażę', na' xezícadxale dxal-la' guchí'ale da na' dxenné'.

<sup>30</sup> Che dxulé'e Dios xetú benne' dxe'e na' tu dizra', na' bénnea' dxuchálaję' dxal-la' gusanę' ca da dxuchálaję'.

<sup>31</sup> Xúgutele le'e waca guchálajle waláz cheę Dios tuwéaj tuwéajle cheę chéajni'i xúgutele, ne sile da gun chacha na le'e.

<sup>32</sup> Benne' ca' dxuluchálaję' waláz cheę Dios dxun na ba xen nna bé'ene' be' nácaqueze',

<sup>33</sup> lawe' da naca Dios Bénnea' dxunne' dxi'u xella dxebeza zri lazre', ne quebe dxun zréajene' bénneache.

Ca zaj xu'u lau xúgute cue' bi bíchedxu, bi cheę Dios,

<sup>34</sup> dxal-la' xelezúa zrize nu'ula ca' naga nazrágale, lawe' da quebe naca cheę' xuluchálaję'. Dخال-la' xuluzúę' dizra' ca naxúaj na lu da nadxixruj bea Dios.

<sup>35</sup> Che dxelaca lazre' bi xeléajni'ine', dxal-la' xuluchebe' benne' cha cheę' lizre tu tuę' lawe' da quebe dxulé'e na chawe' tu nu'ula guchálaję' naga nazrágale.

<sup>36</sup> Dخال-la' gueque be'ele quebe guzú lau xrtizra Dios sua na ládujla le'e, ne quegá le'eze nazí' lu na'le na.

<sup>37</sup> Che nu benne' dxéquene' naque' benne' dxuchálaję' waláz cheę Dios, u zúale Be' Lá'azxa le', dxal-la' gueque bé'ene' da nigá dxuzúaja' cheele naca na tu da gunná be'e Xránadxu.

<sup>38</sup> Che quebe dxaca lazre' gueque bé'ene' da nigá, quebe dxal-la' si' lu na'le bēnnea'.

<sup>39</sup> Ca' naca na, bi bícha'dau', le gun ba xuzre guchálajle waláz chee Dios, ne quebe guzágale bēnnea' dxuchálaje' dizra' nazrá'la.

<sup>40</sup> Xúgute da caní dxal-la' gunle dutē ba lá'ana, ne ca dxal-la' gaca na.

## 15

### *Ca bebán Cristo ládujla benne' gate*

<sup>1</sup> Na'a, bi bícha'dau', dxuzenda' le'e dizra' chawe' da ba bzenda' le'e, da na' guzí' lu na'le, ne da da'le le'e.

<sup>2</sup> Ne chee dizra' chawe' nigá nalale che dxéajlele chee da bzenda' le'e, ne che quebe guca dácheze xel-la dxeajlí lazre' chee.

<sup>3</sup> Da naca blaudxa, bzéajni'ida' le'e da guzí' lu na'a, gute Cristo ne chee dul-la da nabágadxu ca naxúaj na lu dizra' lá'azxa,

<sup>4</sup> na' bulucache' Le', na' bebane' zra guxunne' zra ca naxúajqueze na lu dizra' lá'azxa,

<sup>5</sup> na' ble'e lawe' lau Pedro, na' gudé na' ble'e lawe' lau benne' gubáz chee' ca'.

<sup>6</sup> Gudé na' ble'e lawe' lau bi bíchedxu zaj nácadxe' ca gazxu' gaxúa benne' zaj nazrague' tu zren, na' benne' zan, benne' ca' ne zaj naca bane', láqueze benne' zan, benne' ca' ba gultatie'.

<sup>7</sup> Gudé na' ble'e lawe' lau Jacobo, na' gudé na' ble'e lawe' lau xúgute benne' gubáz chee' ca'.

<sup>8</sup> Bzébedxa, ca gudé chee xúgute da na', ble'e lawe' lawa' neda', lácala neda' naca' ca tu bidau', bi gúlajbe' ba gudé beu' chee'be'.

9 Neda' naca' benne' bzébedxa chee xúgute benne' gubáz chee Cristo, ne quebe naca chia' si' la' gubáz chee Cristo lawe' da gudáu zi' xuzra' bi ca' chee Dios.

10 Naca' da naca' lawe' da guca Dios zri'i lazre' nen neda', na' quebe guca dácheze xel-la zri'i lazre' chee' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchínene' neda'.

11 Quebe zácadxa na che naca neda', u che naca benne' ca', da nigá naca na dizra' bzénentu' bèneache, ne naca na da guxéajle.

### *Ca xelexebán benne' gate*

12 Che da dxuzénentu' bèneache dxenná na bebán Cristo ládujla benne' gate, ¿ájazra naca na bál-lale le'e dxennale quebe xelexebán benne' gate?

13 Che quebe xelexebán benne' gate, Crístoqueze quebe bebane' ládujla benne' gate,

14 na' che quebe bebán Cristo ládujla benne' gate, dácheze naca da dxuzénentu' bèneache, ne dácheze naca da dxeajlí lázrele chee Cristo.

15 Che caní naca na dxexchébentu' chee Dios da wen lazre' lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo.

16 Che quebe xelexebán benne' gate, Crístoqueze quebe bebane',

17 na' che quebe bebán Cristo, dácheze naca da dxeajlí lázrele chee', na' ne nabágale dul-la.

18 Che caní naca na, cá'anqueze benne' zaj nate, benne' ca' guleajlí lazre' Cristo zaj nanítequeze'.

19 Che da dxebeza lázrentu' da naca chee Cristo naca na cheeze xezr la xu nigá, nácadxu baxáchedxa ca xúgute bénneache.

20 Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quézcala xúgute benne' ca' dxal-la' xelexebane'.

21 Ca guca, bla' xel-la gute lu xezr la xu nigá ne chee tuze benne', cá'aqueze ne chee tuze benne' bla' xel-la dxexebán chee benne' gate.

22 Ca naca dxelate xúgute bénneache lawe' da zaj naque' tuze nen Adán, cá'aqueze xúgute benne' zaj naca tuze nen Cristo xelape' xel-la nabán li lazre'.

23 Xelexebán tu tue' gate xelexexale', nédxula bebán Cristo ca tu lina nedxu, na' gudé na', gate xelá' Cristo xelexebán benne' zaj naque' bi chee' ca'.

24 Nadxa cheajsé chee xezr la xu nigá gate guzría xi' Cristo xúgute da dxelenná bea, ne xúgute da dxelixruj bea na, ne xúgute da zaj napa xel-la waca, na' gudé' xel-la dxenná bea chee' lu na' Xradxu Dios.

25 Dxun na ba xen nna bea Cristo ca zrin zra ba nuzúa Dios zran ni'e xúgute benne' guledábague' Le',

26 na' da bzébedxa da cuía xi' naca na xel-la gute.

27 Ba nuzúa Dios xúgute zran ni'a Cristo, san gate dxenná na nuzúe' xúgute zran ni'e, dxaca bea na quebe zua Dios ládujla da ca', lawe' da Léqueze' naque' Bénnea' bzue' xúgute zran ni'a Cristo.

28 Gate ba zua xúgute lu na' Cristo, nadxa Crístoqueze, Bénnea' naque' Zrí'inequeze Dios guzúa cuine' lu na' Dios, Bénnea' bdee' xúgute lu na' Le'. Ca' naca na, Dios gaque' blau lawe' xúgute da de.

29 Xetú da dxaca, zaj zua benne' dxeledxúe' nisa waláz chee benne' zaj nate. ¿Bizr chee na' dxelune' caní che quebe xelexebán benne' gate? ¿Bizr chee na' dxeledxúe' nisa waláz chee benne' gate?

30 Cá'anqueze, ¿bizr chee na' zúatequezdXu dxi'u lu da stebe?

31 Xúgute zra zua' lu da stebe chee xel-la gute. Dxapa' le'e, bi bicha', da li naca da nigá ne chee da ba neza da napa' ne chee lu da nácadXu nen XránadXu Jesucristo.

32 Che ca tu bènneacheze gudíl-lalena' benne' zaj naca ca be snia ca' lu xezre Efeso ¿bizra da ba neza naca na chia'? Che quebe xelexebán benne' gate dxal-la' gundXu ca dxelenná bènneache, dxelenné': "Xi'aj gágudXu lawe' da wxre gátedXu."

33 Quebe güele lataj nu si xe le'e. Naca cáteze dxenná na:

Che gácadXu tuze benne' ca' dxelune' da calela, tu zrénqueze gundXu da calela.

34 Le guxúe xanne' cuínale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee gápale xel-la stu'.

35 Guchebe nu benne' neda': Ájazra xelexebán benne' gate? ¿Ájazra gaca bela' dxen chee'?

36 Da nigá naca na tu da xálaze, lawe' da gate dxázadXu tu binne, dxun na ba xen cuía xi' binnedu na' chee gaca na tu xágadau'.

37 Da na' dxázadXu quebe naca na da xelá', san tu binnedauze naca na, che naca na zrua' xtila u xetú binnedau'.

38 Te na' gun Dios chee binnedu na' tu xágadau' cáteze dxaca lázrequeze', na' chee tu tu binnedau' dxune' tu tu xágadau' cáteze zaj naca binnedu ca'.

<sup>39</sup> Quegá xúgute bela' dxen tuz ca zaj naca na. Tuze ca naca bela' dxen chee bēnneache, ne xetuze ca naca bela' dxen chee be xixre' ca', na' xetuze ca naca bela' dxen chee bxínnedu ca', ne xetuze bela' dxen chee bela ca'.

<sup>40</sup> Cá'anqueze zaj naca bela' dxen chee xabáa, ne bela' dxen da zaj naca na chee xezr la xu nigá. Xel-la xrtan chee da zaj naca chee xabáa nazrá' ca xel-la xrtan chee da zaj naca chee xezr la xu.

<sup>41</sup> Xel-la naxaní' chee gubizra nazrá' ca xel-la naxaní' chee beu', ne cá'anqueze nazrá' ca xel-la naxaní' chee belaj ca', na' ládujla belaj ca', xel-la naxaní' chee tu belaj nazrá' ca xel-la naxaní' chee xetú belaj.

<sup>42</sup> Cá'anqueze dxaca chee benne' ca' xelexebane' ládujla benne' gate. Dxucáchedxu lu ba tu da guzru', na' xebán tu da québedxa gate.

<sup>43</sup> Dxucáchedxu tu da xálaze, na' xebán tu da xabáa. Dxucáchedxu tu da nate ni'a na', na' xebán tu da wál-lalē'e.

<sup>44</sup> Dxucáchedxu tu bela' dxen chee beniácheze, na' xebán tu bela' dxen da naca na chee be' nácaquezdxu. Che zua tu bela' dxen da naca na bēnneacheze, cá'anqueze zua tu bela' dxen da naca na chee be' nácaquezdxu.

<sup>45</sup> Cá'anqueze caní naxúaj lu dizra' lá'azxa da dxenná na: Benne' nedxu Adán guque' bēnneache ban, na' Adán, benne' bzebe, naque' Be' da dxunna xel-la nabán.

<sup>46</sup> Bēnea' naque' Be' quebe ble'e nedxu, san bēnea' naque' bēnneacheze. Gudé nā' bla' Bēnea' naque' Be'.

<sup>47</sup> Benne' nedxu guque' xu bxrte, ne guque'



chee xezr la xu nigá, na' Benne' gudxupe' naque' Xránadxu, Benne' chee xabáa.

48 Bēla' dxen ca' chee xezr la xu nigá zaj naca na ca guca bēnea' guque' xu bxrte, na' bēla' dxen ca' da zaj naca na chee xabáa zaj naca na ca Bēnea' naque' chee xabáa.

49 Ca naca, nácadxu ca bēnea' guque' xu bxrte, cá'unqueze gácadxu ca Bēnea' naque' chee xabáa.

50 Dxaca lazra' xapa' le'e, bi bícha'dau', bēla' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chadía chacanna.

51 Dxapa' le'e tu da nagache nédxute: Quegá xúgutedxu gátedxu, san xúgutedxu sidxu tu bēla' dxen cube.

52 Chadite gaca na, ca dxun benne' guchudie' xexrate lawe', gate xendxu chi'i luzu da dxulu-cuezre' da bzebe. Cuézrequeze luzu da dxulu-cuezre', na' xelexebán benne' gate naga cabátadxa xelatie', na' dxi'u sidxu tu bēla' dxen cube.

53 Bēla' dxen cheedxu da guzru dxal-la' xexaca na tu da québedxa guzru, na' bēla' dxen cheedxu da gate dxal-la' xexaca na tu bēla' dxen da québedxa gate.

54 Gate bēla' dxen cheedxu da guzru ba bexaca na da québedxa guzru, ne bēla' dxen cheedxu da gate ba bexaca na tu da québedxa gate, nadxa gaca li da naxúaj na lu dizra' lá'azxa, da dxenná na: Ba beladxu lu na' xel-la gute.

55 Lue', xel-la gute, ¿ga na' xel-la waca chiu' chee gunu' netu' we'?

Lue', xel-la gute, ¿ga na' da zrué'enu'?

<sup>56</sup> Da dxunna xel-la gute xel-la waca chee gun na dxi'u we' naca na dul-la, na' da nadxixruj bea da gula na' naca na da dxunna na dul-la xel-la waca chee gudé na dxi'u lu xel-la gute.

<sup>57</sup> Na'a, xcalén Dios, Bénnea' dxunne' dxi'u xel-la waca chee zrué'edxu lu dul-la, ne lu xel-la gute ne chee Xránadxu Jesucristo.

<sup>58</sup> Chee le na', bi bicha' nazri'ite lazra', le se chacha, ne le súateze lu zrin dxúndxale chee Xránadxu lawe' da nézele quebe naca dácheze zrin dxunle tu zren nen Xránadxu.

## 16

### *Dumí da gutúpale chee gácalele bíchedxu ca'*

<sup>1</sup> Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgute cue' bi chee Cristo zaj zra' xezre ca' zaj nababa Galacia.

<sup>2</sup> Tu tu zra nedxu chee da gazre zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'.

<sup>3</sup> Gate na' xelá'a, sel-la' xezre Jerusalén benne' ca' cuele, na' gunézruja' le' tu xiche chee xelu'e dumí na' chee bi bíchedxu zaj zre'e na'.

<sup>4</sup> Che gata' lataj cha'a, na' sá'acalequeze' neda'.

### *Da dxugú'u bea Pablo gune'*

<sup>5</sup> Lu neza chia' dxun na ba xen tea' naga nababa xezr la xu Macedonia, na' xelá'a xezre Corinto ca te na'.

<sup>6</sup> Wegá'analja' nen le'e tu chi'i, u che ba guca, na' sua' nen le'e dute beu' zaga ca', na' le'e waca gácalele neda' lu neza chia' naga dxal-la' cha'a.

<sup>7</sup> Quebe dxaca lazra' xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj.

<sup>8</sup> Na'a xegá'ana' lu xezre Efeso nigá ca zrin zra Pentecostés,

<sup>9</sup> lawe' da napa' lataj guna' tu zrin zren chee Xránadxu da gulé'etē lawe na, lácala naxán benne' ca' dxeledábage'.

<sup>10</sup> Che ba bla' Timoteo, le gun ba xuzre suabe' xel-la dxebé nen le'e, ne quebe bi cué'ebe' gunne xue, lawe' da dxunbe' zrin chee Xránadxu cáteze dxun neda'.

<sup>11</sup> Chee le na' netule le'e quebe guzúale-be' chalá'ala, san le gácale-be' chee xexu'ube' neza lu xel-la dxebeza zri lazre' chee xedajnná'abe' neda', lawe' da dxebeza'-be' tu zren nen bi bíchedxu caní.

<sup>12</sup> Ca naca chee bíchedxu Apolos, guta' xúele'eda' le' chee chéajlene' bi bíchedxu ca' xedajlenné'e le'e, san quebe guca lazre' se'e na'a. Wide' gate gape' lataj.

### *Dxulugapa ljwezre' diuzre*

<sup>13</sup> Le sua ban lazre'. Le se chacha lu xel-la dxeajlí lazre' chee. Le se ca ze benne' biu. Le gaca benne' wal-la.

<sup>14</sup> Dute xel-la zri'i lazre' le gun xúgute da dxunle.

<sup>15</sup> Na'a, bi bícha'dau', ba nézquezle gulaca xrtía Estéfanos benne' nedxu naga nababa Acaya gulezí' lu ne'e dizra' chawe' chee Cristo, na' buluzúa cuine' chee xelácalene' bi bíchedxu ca', bi chee Cristo.

<sup>16</sup> Dxaca lazra' guzúa cuínale lu na' benne' caní, ne lu na' xúgute benne' dxelácale ljwézredxu, ne dxelún zrin chee Cristo.

17 Zua' xel-la dxebé lawe' da belelá' Estéfanas, ne Fortunato, ne Acaico, lawe' da belune' chia' da quebe guzéquele gunle le'e lawe' da zrale zitu'.

18 Belún chúchue' be' nácaqueza', ne be' nácaquezle le'e. Dxun na ba xen si' lu na'le benne' caní.

19 Xúgute cue' bi chee Cristo naga nababa xezr la xu Asia dxulugapa le'e diuzre. Aquilo ne Priscila, ne bi bíchedxu ca' dxelezraga lu xu'u lizre' dxulugapale'e le'e diuzre lu La Xránadxu.

20 Xúgute bíchedxu nigá dxulugape' le'e diuzre. Le gugapa diuzre ljwézrele tule xetule, ne le gúnida ljwézrele.

21 Neda', Pablo, dxuzúaja' da dxugapa' le'e diuzre nen ná'aqueza'.

22 Che nu benne' quebe nazrí'ine' Xránadxu Jesucristo, cuía xi' bénnea'. ¡Gudá Xránantu'!

23 Dxenaba' Xránadxu Jesucristo gun cháwe'e le'e.

24 Dxusel-la' chee xúgutele xel-la nazrí'i chia' lu La Jesucristo. ¡Ca'an gaca na!

**Xela wezria cube nen salmo ca’  
New Testament and Psalms in Zapotec, Tabaa  
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

**Copyright Information**

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament and Psalms**

in Zapotec, Tabaa

**© 1981, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

80626b72-93df-58ae-9f5e-9d86733fab46